

Kolosa Vegenalitini Luhuva Pauló Gizo Kimimó

Kolosa vegená nónohá kimike gizo kimi gakó

1 ¹Neza Paulona Ómasímini gakotó Izesu Kilistoni aposolo ve loló utímina neza itó ligiveteho Timotiki makó nousike ²Kolosa numutoka monó gele vegená ligive lagave Kilistotoka alévolé iki gímiziki nimina vegená nene luhuva netá imane gizo nolukumuve. Ómasi ameteheo aitokatí nasahilí itó hulu lekelitoka mino moloko minino.

Kolosa vegenakumú Ómasiloka limó

³⁻⁵Lekeza Izesuni gakó gihila lamaná nene lekelitoka gozapá utó okago okulumakú monó helisa henoni lekeza ali lá itave loko gozapá mololeketakumú giliake alitune liki lakagata losi gelemake ageva iki miniaká niamole liki Izesu Kilistokumú gili alévolé iaká niamó itó monó gele vegená mukitoka likigika kimiaká niamó nenémini gakó likago gelekusike leza Guivahanite Izesu Kilistoni amelaho Ómasi nene lekelikumú gamena gamena agepoka loaká nousive. ⁶Ámina gakó lamaná nenémo numutó namató hutilí oloko vova vova oko gihiláa ale utó oaká noimómámini oko lekelitoka ganá apí oko anitekago Ómasímo nasahilí olimiaká noi gakó nene lamanatotí gili guni iake, nene gamenatotí lekelitoka ámina oko gihiláa utó oloko voaká noive. ⁷^aLigiveteho ligika amenousi ve Epapalá lelikumule loko Kilistoni gelekelé izegipala lamaná áisi mota ámina gakó gihila lo lekemekago gilinamóma neve. ⁸Áisi nene Sikalahulímo lekelémo vávani igo likigika eza amigo eza amigo iaká nia gakó geleake mota oko lo lemekave.

⁹Leza gakotini lamaná gelekusike áminaló apí oko Ómasímo geleakatini ale napa okiko eza geleko moloko imoláa giliiki Sikalahulímini gele vevesoaká gakola gili guni iki gilitave loko Ómasiloka loko nominusive. ¹⁰Itó lekeza miniki aliki iki miliki itamó

^a 1:7 Kolo 4:12; Pile 23

nenémo mognatini ale utó molokiko Guivahanímo áinigokiko lamaná itive loko, itó monokú hoza haitopaitó naliki nenémini gihiláa ali utó itave loko, itó láa niiki Ómasímini mogona gili guni iki giliki minatave loko numuna loaká nousive. ¹¹Itó Ómasímini zamuza nene sigagavagi netá olfo ititimó nene viki akamiki legeso iki ali ghiiki mulutikú agila guluma iko minatave loko numuna loaká nousive. ¹²Itó ameteho eza veletoka lapanalagi apakú helisa henoni mololetamó nene monó gilina vejená lekezagi izá miliki alitave loko ale vavá oko mololeketamó nenemú mulutikú lamaná giliki agepoka lilo. ¹³Ómasi eza límugusi amelahini zámuzalotí gologí olimiake ánigo amu hili gipalámini gizapaló nominuhakú lelémo molamó. ¹⁴^b Gipala áisi nene lihimate ahulolimiake gologí oletake meinavate hizimó neve.

Kilistoni ametamenigi hozavagi

¹⁵Gipala áisi ánigamoaká ve Ómasímini ametamenigi utó ike netá mukí avilegeko mina vémo nominave. ¹⁶Lá oake minoakató netá mukí okulumató itó mikasiló ale utó o asú oko ale utó imó nene ánigoakalímini itó ánigamoakalímini, vejená ahe itó ageló ahe zámuzalagi lelege loko mina netá nene helisa iteko minamó nenehe itó kugulizaki ve minamó mukí nene aí zámuzaló utó amó neve. Itó aí mututoni itave loko utó amó neve. ¹⁷Itó netá mukí utó amigo amunalotí emane gipala eza mino-loko voko minamó. Itó netá matá mukí nene aí zámuzaló apize lamaná okave. ¹⁸^c Itó áisi nene agisa agizani loló oko nouhá vejená nene lelí gotola loló oko noive. Lá noiike apí oaká itó vejená helenosakutí ale goí oko mómoká oko oteaká amelaho minake netá mukí nenémini lapusaváa loló imó. ¹⁹Ómasímo ezáa ametameni nene gipalaloka mulusi moloko minative loko gelekago etamó. ²⁰^d Itó netá mukí nene okulumatoka itó mikasiloka Ómasi ezáagi goha lelémo apizitive loko lomikago, áisi nene zohota zaló golanía lekike ale geha zike nenémini imó neve.

²¹Lekeza gozapá Ómasigi otopá ziki minake gala veva lilí iki minake lekemegeza amiake netá golesa haitopaitolímini aliki miniaká amóma nemóza, ²²itína Kilistoni agupe hilimó nenémo hulu lekemekago, likigika gizopa lo miniko apazá keké viziki Ómasímini avogisaló lihima nomimó minatave loko goha aitoka lekelémo apizimóma neve. ²³Itó nenemú lekeza gele alévolé oakakú alévolé iki miniki luhusatini ali kii lominago Izesuni gakola lamaná giliake monó helisa henonimú lakagata losi gelemiki ageva iaká niamó nene gopa olikimikatize, gelegele huzá giliiki minamilo. Ámina netakumú gakó lamaná li likiminamóma nene lekezagó ma nomive. Numutó namató vejená li kimiliki vinamóma neve. Itó neza Paulona nenémini gelekelé izegipala loló oko nouve.

^b 1:14 Epe 1:17 ^c 1:18 Epe 1:22-23 ^d 1:20 Epe 2:16

Pauló monó gele vegeñalitini gelekeleláa minamó

²⁴Neza lekelikumule loko miluma netalímíni amupiló nominuve. Nenemú imane gelekugo lamaná onoive. Kilistoni agupémíni agisa agizani lilí iki nia vegeñá lekelikumule loko Kilistó miluma maluma gilimóma neve. Ámina milumámíni nekisaloka miní ameko geleaká netá nene není numupiló itekago ale asú ito hoza naluve. ²⁵Neza Ómasímíni gakó hize hutilí oloko vitive loko monó gele vegeñalitini gelekeleláa mininake lekelitoka Ómasímíni gakoíá lo lekeme-loko novoko ale lutigitane loko nelémo etó imóma neve. ²⁶Vegeñá omolelé amalelé iki mini-liki nitego ámina asuguná gako amegesáa nene vegeñalite gelemítave loko halá geko minokago gelemunike hanuva minuháza, itína gamena nene monó guluhá vegeñá ale vesamá oko lo lemekamóma neve. ²⁷Itó hetoka vegeñatoka gako amegesámú minumuni lamaná minamó nene monó gele vegeñala nene asuguná gakoíminí gihiláa lo utó moloko lo limimó nene lá oko neve: Kilistó eza mulutikú minoaká noikumule liki okulumakú helisa henonimú lakagata losi gelemake ageva iaká niave. ²⁸Aí mogona lo utó moloko numutó namató vetitoka lo kemeaká nounge. Gele vevesoakatumú kagata aleko lainim-olikimiaká nounimó nene Kilistoni vegeñala gihila lilí iki aitoka gímiziiki likigikámo monokú napa omo iteko alévolé oko minative loko ²⁹aí zámuza sipisi nenémo hize lé onimikago hozaváa nene amuza moloko aleaká nouve.

2 ¹Neza lo likimitoze, gililo. Lekeza niamó itó Lautisia numutoka vegeñá niamó itó vegeñá lugáa nogoka áñigama vegeñá lekelikumule loko hoza aleloko vonoumó nene lagasó nomive. ²Lekezagi likigikatunú amuza miliki likigika eza amiko eza amiko iki múnahi lamaná iiki netakumú gili vevesiiki Ómasímíni asuguná gakoíminí mogonáa itó Kilistokumú gili guni iki neneloka viki gímiziki minatave loko hoza aleaká nouve. ³Aitoka nene likigikagú luhuva utó oakalímíni gele vevesoakaláa nenémíni ohunáa halá geneimó neve. ⁴Ve makolímó laga likivisiti gako lo lekemekiko likigika gopa okative loko gako imane lo nolukumumó nene ⁵nezáne nugupetunú hotó minuke nigikatunú lekezagi nominuke lekeza Kilistokumú gili alévolé iake múnahi lamaná iake alévolé iki niminamó nenemú gelekuke mulúnegú lamaná geleaká nouke luhuva imane gizo nolukumuve.

**Kilistotoka gímizitunimó nene ligikámíni netá
makokumú vitagá aminogune**

⁶Lekeza Izesu Kilistoni nene Guivahanite loló o limitive liki ali mulutikú milamómámíni lelegító nene aitoka gímizi lamaná iiki iki miliki ilo. ⁷Lá niiki aitoka luhusatini alekiko mini gikitiki minalo. Itó monó gapo lekelepizanamóma nene áminamalokó lisi lisi niviki lehizeleketa

netakumú agepoka lii liiki minatamó nenémo likigikagú vaí oko minino.

⁸Ve makolímo vegenatokatí geleaká gakó itó logoka vizeaká gakó hutuváa lo lekemekikoma, nenegú viki nagá ikataze, gizapa iki minalo. Gakó nenémináa nene avotegini kigikagutí utó okago omolelé amalelé iki miniliki itetoka itó mikasímuni amupiló gihiláa nomi netakumú li mila gakotó gímizi minake liaká nia vegutí neve. Kilistoni gakó nomive. ⁹Gilinahe. Ómasímuni avevezahaváa mukitó nene Kilistoni agisa agizatokagi agupeló mukí mino gikí oko neve. ¹⁰Lekeza aitoka gímiziate likigikámuni netá makokumú vitagá aminigave. Áisi nene gizapa oaká netá itó kugulizaki niamó mukilitini gotoláa noive. ¹¹Aitoka gímizikago nene likigikauka Kilistoni luhuva neve. Vegenalite kigizanitunú lukugupeló luhuva zeakaláa nene nomive. Miniki aliki iki miliki iaká amó litaha nene golohá i ahuliate Kilistotoka vake nene gosohá lilí inamóma neve. ^{12^e} Monó nagamí hililitake áisi hilikú miní amilitinamóma neve. Lá ikago eza zámuzalatunú Kilistoni alémo oti zámuzamú gili alévolé ikago gosohá lekemetameki miniki aliki itató miní ameletekatove loko lekelémo otimóma neve. ^{13^f} Lekeza gozapá likigikaló itó lukugupeló Ómasímuni anosa nomimó minake golesa netá gopánapa aliki minamómave loko likigika hele vimó niago, Ómasi eza lihimavatini ahuloake Kilistoki lekelémo otimó neve. ^{14^g} Lá imó nene gakó pelevesava zeaká unikumú goní oletati luhuva gizo molamó nene gilato nahulake nenémuni lihima ale nupa okoko zohota zaló apatekago haha okamóma neve. ¹⁵Lá noike kugulizaki itó amuza mili mina ve lovagú kivilegeake zámuzáini gologolo soketakumú vegená kovogisalo kovoza helepelé imó nenémuni mogona ale utó molamóma neve.

^{16^h} Nenemú nosáneta makokumú ahe itó soza saza holisimupe itó ikanímuni holiváahe itó holisi ale etó oko minoakakumupe itó minamoakalímimumupe ve makolímo ámina netakumú lihima alikave loko nolikoma gili amemilo. ¹⁷Netá nenémináamú hanuva hutuváave loko litune. Gihiláa nene alika utó itive loko samapala noave loko litune. Itó gihiláa nene Kilistotoka utó oko neve. ¹⁸Ve lugáate likimimí lakamamá iki lekezatini aliliki limiki minata gakó li likimiki iki ageló vegená gupá zi kimitave liki lakagata hiziki itó ligikate mino viligokago netá ángo vevesoaká une liki li likimikikoma, nenemú gilikiko gihila loló amino. Hanuva kagata giliakaláa nemóza, kugupéini nene hanuvamú aliki itiaká niave. Ve nenémináate monó gihiláatini ipá ilikimikataze. ^{19ⁱ} Keza nenémináa Kilistotoka viki gímizemó mota gologolo sokave. Áisi nene gotote noigo lélisi nene agisa agizanía nune. Agisa agulúnaha nenémo limike luhusate ale gikitoletamó. Lá oake múnahetoko hizevo lé ovo oletake noigo zámuzá Ómasilokatí alekunike utó o napa oloko voaká nune.

^e 2:12 Lom 6:4 ^f 2:13 Epe 2:1-5 ^g 2:14 Epe 2:15 ^h 2:16 Lom 14:1-6 ⁱ 2:19 Epe 4:16

Kilistó hilitó miní amekunike ligika heleneikutí otekune

²⁰Kilistó hilimó neneló lekeza miní amiki lukugupémuni netakumú li hukina gakó gele aleakakumú mota hilikamó geleneimóma nenazo, imane mikasímuni amupiló gihiláa nomi netakumú li huka gakoláa nanamú gelekelé iaká niave. ²¹Li huka gakóma láa loko neve: Nene ale gelemo. Volane namo. Imane no gelemo. Gakó nenémináa livi hukivi iaká niamó nenemú noluve. ²²Ale geleko nokuko asú oaká netakumú li hoipa iaká niave. Itó vegealite hanuva kagatatunú gelemó vevesokago ali nupa napa iki iaká niave. ²³Ve nenémináate ha vejená nenémináate kezáini kagata geleke monó nenéminiki lilo liká itó lukugupelini ali limilo liká itó lukugupe apiliki zivi hutivi ilo liká nia gakó nene gele vevesoaká gakó gihilagitana loló okamóza, netá nenémináamo gihiláa nomive. Nenémináa nene lugupémo amu heleaká netalímuni gahe ma getaminogo ive.

3 ^{1j} Kilistó mómoká oko otimómáminiki lekeza likigika heleneikutí otinamó neneta, veletoka Ómasímuni zamagaloka Kilistó noitoka ne netakumú nene gili minalo. ²⁻³Lekeza netá golesa alitakumú hele vejená lilí inamó gelekago, miniki aliki ita netalímo Kilistogegi lekeza monéna Ómasímuni amatoka voko halake minamó nenazo, mikasigú netá matá nemó nenemukupa, veletó netakumukó giliki minalo. ⁴Kilistó eza miniki aliki atímuni mogona noinazo, eza goha utó noiko lekezagi nene aí lapaná hugepavagi izá miliki alinigave.

Litaha ligikámo oko moloko imó gololohá okunike ligika gosohá ale luhokune

⁵Nenemú netá lá okomú nene etó iki miniki lukugupémo mumuzó iti netá nene musi netá, golotuva netá, mulutini gitihiná oaká netá, mokoló mogona, itó mulutikú nihunihi loaká netá, nenémo sozaló ómai netá ámegetoaká suni nenazo, netá nenémináa apili hilikiko helegelesino. ⁶Ámina netá mukikumú nene Ómasilokatí mesaha utó inogo ive. ⁷Itó lekeza gozapá ámina iki netá nenémináa ali minago likigika loló imóza, ⁸itína nene ahulalo. Mukahá pakaha, hokolizá, mesaha, hokolizá, ulínaka gakó, itó golatalaka gakó netá nenémináa nene ahuli asú iki ahulalo. ^{9k} Litaha likigikámo oko moloko i netá nene gololohá iki ali ahuliake likigika gosohá ali luhikamó nenazo, soza gakó eza lo amiko eza lo amiko amilo. ¹⁰Aí mogonamú gili vevesatave loko gosohá lekemetameni nene ezáa ametamenigitana oko lelémó utó itímó ale lamaná ova ova oaká noive. ¹¹Nenemú haitopaitó minuháma nene asú okamóma neve. Hetoka vejená minuhá itó Zuta vejená minuhá, lugupeló Ómasímuni anosa nemó

^j 3:1 Age 110:1 ^k 3:9 Epe 4:22; 4:24

nomimó, zauka vejená itó gihisigú vejená, megusámini nagakú niamoláa minamamoláa monéna minamuko, Kilistó ale nupa oko lelí ve napa loló oake mulutegú mino vaí oko noive.

¹² ^l Ómasímini vejená lekeza ezáa agika lekemeake lekelémo etó okago apazá niamó nenazo, nenemú lekeza likigika hize kimiaká itó nasahilí ikimiaká itó likigika lamanaki minoaká itó lukugupe aliliki limiki miniaká itó likigika ale geha zekago legesó oko minoaká nenémo gineganetini loló okiko ali luhiki ali minalo. ¹³ ^m Lekeza hulu vejená miniki itó holutikú gakó utó noikoma Guivahanímo lihimatini ahulamó nenéminiki lekezagi lihimatini eza ahulotiko eza ahulotiko iki minalo. ¹⁴ Itó netá mukí nenémini amupiló likigika kimitamó nene mukí netá ale nupa oko múnahekago mino hamó oake avasavagi minoaká netá nene ali luhiki minalo. ¹⁵ Lá okiko Kilistoni hulúmo likigikagú gizapa oleketino. Ámina hulu lekeza ali lá itave loko Ómasímo lekelémo etó okago aí agupe hamó lilí inamóma neve. Itó lekeza lehizelikimiaká noi netakumú agepoka liki minalo. ¹⁶ ⁿ Kilistoni gakolímo likigilikagú hize hutilí oko minino. Itó Ómasímini gele vevesoaká gakó haitopaitolímíni eza lo amiko eza lo amiko iki lekezatini lakagata aseva aliki lainim-ilikitalo. Lá niiki likigikatunú Ómasi geké litiki monó nama itó ipá apá nama itó Sikalahulímo lekelémo vávani iko gosohá nama liki likigikatunú lokogoliza vizé vizé iki Ómasi agepoka lii liiki minalo. ¹⁷ Itó lekegepatunú ahe itó likigizanitunú ahe netá iki miliki inigima nene Guivahani Izesuni agulizá iki netá mukikumú Ómasi ametehini agepoka liki minalo.

Lezatete izolaho amelaho gelekelé izegipa kugulizaki ve gosohá iki miliki ita gakó

¹⁸ ^o Vená lekeza vatinitini kagahaisiuka limiki minalo. Guivahanímini mututoni lilí ikatita nenémini ikiko lamaná inogo ive. ¹⁹ ^p Ve lekeza venatini likigika kimilo. Itó alévoleka li kememilo. ²⁰ ^q Itó gipa mohó lekeza izotike ametike mukí gakó litamó nene gili alilo. Lá itamó nene Guivahanímo giliko lamaná inogo ive. ²¹ ^r Izóikita améikita lekeza izegipatini kizapaló moloko goselé kipiliti netá lilí ikitamilo. ²² ^s Itó gelekelé ve lekeza mikasiuka kugulizaki velinitini gakó nene netá matá mukikumú gili alilo. Itó keza lugupeló ángigikiko lamaná itive liki gili minigigopa, likigikagú lovaleta minamiko Guivahani Izesukumú goliva gili miniki lá ilo. ²³ Hozalini mukí nene vejenakumule likigopa Guivahanimule liki likigikámo vávani iko iki miliki ilo. ²⁴ Lá niiki lekeza Guivahani Kilistoni gelekelé imiaká nianazo, lekelí hozámini meinaváa okulumakú helisa henoni nemó nene Guivahanilokatí alitunimó neve liki

¹ 3:12 Epe 4:2 ^m 3:13 Epe 4:32 ⁿ 3:16 Epe 5:19-20 ^o 3:18 Epe 5:22; 1 Pit 3:1
^p 3:19 Epe 5:25; 1 Pit 3:7 ^q 3:20 Epe 6:1 ^r 3:21 Epe 6:4 ^s 3:22-25 Epe 5:6-8

gili miniki hoza alilo. ^{25 t} Makó keza hozaváa makó ali golesa iki alitamó nenémíni helegáa alinígave. Itó Ómasímitoka iteko lemeko negopa, hamó lelegító liminogo ive.

4 ¹ Lukugulizaki ve lekeza gelekelé izegipatinítini netá makó ali gopa ikitamilo. Ali hehe likítiki kimilo. Itó lekelí Guivahani okulumakú noinazo, alika lelí hozámíni mogona ale utó inogo ive liki gili minalo.

Kagata aseva aleko loketa gakó

² Lekeza goselé lekepelemiko Ómasiloka liki minalo. Itó gizapa iki niiki lehizeleketa netakumú agepoka lii lii iki minalo. ³ Itó Ómasímo monolímíni gahe segelikikiko, Kilistoni asuguná gokoláa lo utó oko lo lamaná oko lo kimitune liki numuna lilo. Nene gajokumule loko nagá numukú nominuve. ⁴ Itó numuna loakatunú hizi lé inimikiko, neza gakó nenémíni lokugo etatító nenémínoko lo utó oko lo kimitoze.

^{5 u} Ómasímíni geisa hetoka mina vejenaki hotu li lomala iiki keza mikuka ititave liki netá matá ali guni iki líl' ikitalo. Netá lamaná aleaká gamena utó olíkimitímó nene ma likivilegemino. ⁶ Gakotini nene age hilimikiko lagaváa loló ino. Lá okiko vejená makolite gakó némini manámináamú nana oko ale vilígoko lo kimitune liki ligitagani aminígave.

Geké loketamó

^{7 v} Není aveté gakó nene Tikikó lo likiminogo ive. Eza ligivetehe nigika amenou ve Guivahanímíni gelekelé izegipa gakó gele aleakalímíni noive. ^{8 w} Eza nene minoko aleko nouhatímíni gokoláa lo lekemekiko likigika ale hulu itive loko lekelitoka amiselekugo núane novive. ^{9 x} Itó Onesímo monokú alévolé oko nomina ve ligivetehe nigika amenou ve lekelí numutokatí vema ezagi itína amiselekugo makó viki imane numutotí gokoláa li likimi asú inígative.

^{10 y} Nagá numukú ahulilimikago nousi ve Alistakó itó Panapasini aholaho Makí itó Zosúa agulizaláa makó Zustó keza getetini nililikitago noluve. Makini gokoláa goí oko lo lukumumóma nenazo, áisi vo anitekikoma ali lakamatoka milalo. ¹¹ Zuta vejenakutí Izesuni gakotó ámegeta vejenakutí ámina ve losive makole nenete kezagó Ómasímíni gizapaló minoakalímíni hozaváamú nilími vatí iaká niave. Lá ake mulutegú ali lamaná iaká niave. ^{12 z} Itó lekelí numutokatí ve makó Epapalá eza Izesu Kilistoni gelekelé izegipala makolímó nene getetini nololeketago lo nolukumuve. Áisi nene Ómasímo hize lé oletetiko lekeza Ómasímo lititoka molatitoka gili hee liki monokú lakagata gululusi

^t 3:25 Epe 6:9 ^u 4:5 Epe 5:16 ^v 4:7 Apo 20:4; 2 Tim 4:12 ^w 4:8 Epe 6:21-22

^x 4:9 Pile 10-12 ^y 4:10 Apo 19:29, 12:12, 13:13; Pile 24 ^z 4:12 Kolo 1:7

gelemiki olopagó minatave loko amuza moloko Ómasiloka loaká noive. ¹³Neza aí mogonáa mota gelenouke lo nolukumuve: Lekelikumupe itó Leotisia numutoka itó Hielapoli numutoka monó gele vejenakumupe miluma hoza sipisi aleaká noive. ¹⁴^a Lelí lusa ve tota nigika amenou ve Luká itó Temá keza geketini nililikitasigo lo nolukumuve. ¹⁵Neza Leotisia numutoka monó gele vejená itó monó vená Nimipá itó Ómasímini vejenala zuha aí numukú monokumú alegesá iaká nia vejenakumú gekéini noloketuze, li kimilo. ¹⁶Lekeza luhuva netá imane vejená mukí gati kimikiko gili asú iki gilikiko, Leotisia numutoka monó liaká nia vejenatoka milikiko vokiko nene gatatave. Itó keitoka luhuva makó gizumó nene áminámini iki likimikiko lekeza gatataze. ¹⁷^b Alikiponi nene monó hoza Guivahanímo lehizegetamó nene legesá oko minoko ale lutegeko alezo liki li amilo.

¹⁸Neza Paulona itínasa luhuva nogiza vémini agizakutí luhuva gizoaká nogosanima alekuke nezáne nigizanitanú nugulizáne imane nogizuve. Nagá numukú noumó nene lakagatí molokatize, nenemú gili minalo. Ómasímini nasahilí nenémo lekelitoka mino moloko minino.

^a 4:14 2 Tim 4:10-11; Pile 24 ^b 4:17 Pile 2